

Korazini mpe Bethsaida ezalaki bingumba oyo ezalaki pembeni ya Lac ya Galilaya. Ata bazalaki kobenga yango *mbu*, kasi na solo ezalaki lac, pamba te mbu esengeli ezala na mayi ya mungwa, kasi Galilaya ezalaki na mayi ya pete (mayi ya mungwa te). Na ndakisa, ezalaki lokola Lac Victoria, kaka ete Galilaya ezalaki monene te lokola Victoria. Lac yango ezalaki mpe ezali kaka kino lelo na nord ya Isalaele.

Pembeni ya lac wana ya Galilaya (to Bahari ya Galilaya) ezalaki bingumba misato ya lokumu: Korazini, Bethsaida mpe Kapernaumu. Soki tokokanisi na ndenge ya pete, tokoki koloba ete ezalaki lokola Mwanza, Mara mpe Kagera oyo ezingaka Lac Victoria. Boye mpe, bingumba misato wana ezingaki Galilaya.

Na tango oyo Nkolo Yesu azalaki awa na mokili, bisika ya liboso oyo abandaki kosakola Sango Malamu ezalaki nde na bingumba wana misato, pamba te ezalaki mosika mingi te na Nazareti, esika Yesu akolaki. Yango wana, bingumba wana ezwaki ngolu ya kokamwa, mpo bamonaki bikamwa minene mingi koleka bingumba mosusu ya Isalaele lokola Yeruselemi, Bethania to Samaria. Na boye, bato ya bingumba wana basengelaki kozala ya liboso kobongola mitema mpe kondima Mobikisi, kasi esalemaki ndenge mosusu nyonso... Yango nde Nkolo Yesu alobaki maloba

oyo mokolo moko:

Matayo 11:20-24 (Mokanda na Bomoi)

20 Boye Yesu abandaki kopamela bingumba oyo asalaki bikamwa na kati na yango, pamba te babongolaki mitema te.

21 “Mawa na yo, Korazini! Mawa na yo, Bethsaida! Pamba te soki bikamwa oyo esalemaki epai na bino esalemaki na Tiro mpe Sidoni, kala mpenza balingaki kobongola mitema na kolata bilamba ya kolela mpe komipakola putulu.

22 Kasi nazali koloba na bino: na mokolo ya kosambisama, ekozala pete mingi mpo na Tiro mpe Sidoni koleka bino.

23 Mpe yo, Kapernaumu, okanisi ete okotombwana kino na likolo? Te, okokitisa yo kino na mboka ya bakufi. Pamba te soki bikamwa oyo esalemaki epai na yo esalemaki na Sodoma, engumba wana elingaki kozala kino lelo.

24 Kasi nazali koloba na yo: na mokolo ya kosambisama, ekozala pete mingi mpo na mokili ya Sodoma koleka mpo na yo.”

Makomi oyo emonisi biso ete, ata bato ya Sodoma mpe Gomora basambisamaki na moto makasi mpo na masumu na bango, mpe bakufaki na mpasi monene, kasi etumbu yango esukaki te kuna. Bakokoba lisusu kozwa etumbu sima.

Likambo yango ezali ya kobangisa mpenza. Soki omoná ata elilingi ya likama ya moto oyo bato baziki, okoki kokanisa te ete bato ya lolenge wana bakoki lisusu kokende kozwa etumbu mosusu. Kasi Biblia eteyi biso ete ata soki mosumuki akufi awa na mokili na etumbu ya Nzambe, kuna oyo akokende, akokutana na etumbu monene koleka oyo ya awa. Yango nde Nkolo Yesu alobi na verse ya 24.

Maloba wana:

“Ekozala pete mingi mpo na mokili ya Sodoma koleka mpo na yo.”

Elingi koloba ete bato ya Sodoma bazali naino kozwa etumbu; bazali sik’oyo na mboka ya bakufi, bazali konyokwama, mpe na mokolo ya suka, na kosambisama ya Kiti ya Bokonzi ya Pembo, bakosambisama mpe bakobwakama na Lac ya Moto, esika minyoko ekoleka mingi lisusu.

Kasi Nkolo Yesu azali lisusu koloba ete: *“Ekozala pete mpo na Sodoma koleka bino”*, elingi koloba bingumba oyo eyokaki

mateya mpe emonaki bikamwa mingi, kasi ebongolaki mitema te.

Yango emonisi biso ete, na Lac ya Moto, etando ya minyoko ekokesana. Bato mosusu bakonyokwama makasi koleka basusu. Satana akonyokwama ndenge moko te na moto ya ekobo; mosakoli ya lokuta akonyokwama ndenge moko te na mwasi ya bosumba. Etando ekokesana.

Kasi awa Nkolo azali koloba polele ete bato oyo baboyi kobongola mitema atako bamonaki bikamwa mingi ya Nzambe, masumu na bango makasi koleka ya bato ya Sodoma mpe Gomora. Yango wana, bakosambisama makasi koleka bango.

Oyo ezali likanisi mokuse ya komanyola mpo na lelo. Esengeli tómanyola yango malamú: bikamwa oyo Molimo Mosantu azali kosala na bomoi na biso, oyo tomonaka bisika nyonso, esalemi te mpo na kobengisa biso kaka na esengo, kasi mpo na kolakisa ete Liloba ya Nzambe ezali ya solo. Yango wana, ezali mokumba na biso kobongola mitema mpe komipesa na bosantu.

Mpe soki Yesu azali naino libanda ya bomoi na yo, oyo nde tango ya koyamba Ye, mpo tókweya te na maboko ya kosambisama ya Nzambe. Pamba te ezali polele ete biso oyo tozali na tango oyo,

tomonaka bikamwa minene mingi koleka ata oyo bato ya
lingomba ya liboso bamonaki, kino tokomi kosalela yango lokola
eloko ya momeseno.

Tika ete Kristo asunga biso tózwa ekateli ya malamumu.
Nkolo apambola biso.

Share on:
WhatsApp